

PAAVORO ITIONCAJIAQUENERI GARASHIAQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaciaquenerigueti tsaromentajiacarica Jesoshi choocajanquitsica quepatsiqui pajitatsica Garashia. Iriraqe Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarensi Oganejencatatsica, teetarite inquemisantajigueroji jorio itsavetantimojiavetacanicarica. Irocashi itioncacotaquero irira Paavoro otsipaqui paperiqui (Ya. 7.57–8.1; 9.1–31; 13.1–28.31), aisa itioncacotaquero ichooaquegueti Paavoro Garashiaqui paperiqui Yantajiguica 13–14; 16.1–6. Chooca quenquejanquitsica itioncacaantaquero Paavoro ocatica paperi ajagantsiniqui 48, ichooaquegueti guinteninintsiqui pajitatsica Antioquia quepatsiqui icantajitica Shiria. Itsipajia iquenquejajiaque itioncacaantaquero ajagantsiniqui 52, mavitetapojacagueti iquenaguetaquegueti quepatsipaequi itsavetantavaequerigueti Jesoquirishito, ichooaquegueti guinteninintsiqui pajitatsica Corinto. Itsipajia iquenquejajiaque itioncacaantaquero ajagantsiniqui 56, otsipatapojacagueti iquenaguetaquegueti quepatsipaequi itsavetantavaequerigueti Jesoquirishito, ichooaquegueti guinteninintsiqui pajitatsica Epeso.

1 ¹Naroguenti Paavoro tioncaciaquem-pica imaica. Naroguenti itigarancane Jesoquirishito. Teequea iriguenti nintacaguenane caquinte, teequea iriguenti tigarancanene caquinte, iriguentitarite tigarancanena Jesoquirishito jeri aisa Aapani Irioshi vochantajirica. ²Notsipajiacariqueate apitsaromentarijiate notioncaciaquempigueti maasano aviatimpajia choocajitsica ontaniqui Garashiaqui capiocapinijsica tsovironaquipaequi. ³Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite

pishoshomentajigaro taaca opajitapae.

⁴Ipacajiroquea Quirishito imetojane irishejiajajironijite agovaeguisherjia aatonijite aquejijaari choocajanquitsica imaica antaguishetiroca covaeguisherentsi, irootaquetari ininqueca Aapani Arioshite. ⁵Cameetsaquea ancoguitempani antsaromentajiaquitemparini Aapani Irioshi. Ari oncoquepa.

**Tee onchoocateji otsipa
Quenquetsatsarensi Oganejencatatsica
itigarancaqueca Aapani Irioshi**

⁶Icagemajiaquempiquea Aapani Irioshi incavintsajajiaquempiniji Quirishito.

Imaicaquea manaquea namenanaque intati noquemacojiaquempiguetei teequea picancani pinquemisantamajajigueroji Quenquetsatsarensi Oganejencatatsica itigarancaquea Aapani Irioshi, iroguenti-quea taampinaquea pipitsocashijianacaro icantajiaquea cantashitataroca.
 7¿Pijiqueji chooca otsipa Quenquetsatsarensi Oganejencatatsica itigarancaquea Aapani Irioshi? ¡Teequea onchoocateji! Manatarite ichoocajiaque intati cantashitajiacaroca Quenquetsatsarensimajaca tsavetantaquerica Quirishito, iriotari asereajiaquempi. 8Querica cantashitatiequemparoneca Quenquetsatsarensi Oganejencatatsica notsavetantimojiaquem-pica cameetsataquequea iroanaque camorecariqui. Ariguetei naatimpa noncantashitatiequemparo incatsimatimenquenaroquea Aapani Irioshi. Ariquea inquejetaquempaguetei irashivantijitete manaquea inquenavepojaquempa jenoqui inquitequi, irioguetei cantashitatiequemparone incatsimatimiqueriquea iriatimpa. 9Nocantajiavequempiqueate coramani imaicaquea noncantsitajempiqueate aisa: cameetsataque iroanaque camorecariqui querica cantashitatiequemparone Quenquetsatsarensimajaca paajiaquea nocamantajiaquempiguetei. 10Teequea irooquea noninte irishineventena caquinte. Iroguentiqueate nonintaque irishineventaquena Aapani Irioshi. Iriomeguetei nonintaque noshinetacaaquemparime caquinte aatomequea nopegame itigarancica Quirishito, aatome nocantirime: “Quirishito, pashintenaja.”

Quero oquenapojini itsavetantica Paavoro

11Napitsaroveritarijiate, imaica nonintaque pintsamajajiaquequea oratica Quenquetsatsa-

rentsimajaca Oganejencatatsica notsavetantaquea teequeate iroguenti irashijia caquinte iguenquejane. 12Teetari irioquea camantenarone caquinte, teetari irioquea tsatacaajiguenane. Iriotaquequea tsatacaaque-
 13Piquemacojiavetaque-
 14Noquejejiavecariquea
 15Cotanquitsiquea
 16Yonigaaquenariquea
 17Teequea
 18Ariqueate avisanaqueguetei 3 ajagantsi
 19Ontaniquiqueate aisa
 20Yamenamajataquena Aapani

tequerataguetei novogeeji, ariquea icajemaquena. Aapojacaguetei savincaguiteri inintantacaca 16yonigaaquenariquea Irijanite cameetsanjite nontsavetantaquerinijii noncamantajiaqueriquea caquinteguetsatsica teeca irijorijoigeeji. Yonigaaquenariguetei teequeate querica caquinte naventanaquempariquea noashitanaqueriquea noncoacotaquiteri taa nantaque. 17Teequea ariquea noncantanaquempaji Jerosarequi ichoocajiaqueguetei iriquetica peajianquitsica itigarancane Jesoshi naventajianaquemparimequeate noncoacojiaquiterime, manaquea taampina nocantanaca Araviaqui. Coajica noanaji Tamashicoqui.

a 1.19 *Santiago*. Iguenquetsatsarequi guiriego ipajita *Iakobos*. Iconoagarantaca quimajareri yoguipitsocaqueroguetei ivajiro ipajitiri *Santiago*, itsipa ipajitiri *Jacobo*. Mavite oponeaca iguenquetsatsarequi evereo, ipajitiri *Yaakob*.

Irioshi teequeate namatavijajiguempiji, arimajaquea nocantajiaquempi. ²¹Ariquea noanaque nochoocaquitiquea Shiriaqui jero aisa Shirishiaqui. ²²Irraqueate Joreaquitica tsarorentajigarica Quirishito tequerataquea irinejajiguenaji. ²³Manaquea iquemacojiaquena intati icantacojitaquenagueti icantajiti-queate: "Irra catsimavetacajica nintavetanquitsica interoncajiacajime imaica chooca icamantajiaqueri maasano: 'Paventempari Jesoquirishito irimeshiantaquempica.'" ²⁴Irootaquequeate ishineventantajianacarica Aapani Irioshi iquemacojiaquenagueti.

Yoanaquegueti Paavoro Jerosarequi

2 ¹Ariqueate ocoramanivaetapoji-gueti 14 ajagantsi ariqueate noajati aisa Jerosarequi, iriguentiqueate notsipatanaca Verenave notsipatsipaitanacariqueate Tito. ²Iriguentitari tigarancaquena Aapani Irioshi noantanacacaquea. Ontaniquiea Jerosarequi iriguentiqueate noconoajiapoja quempoguijajiguirica quemisantajatsica, nocapiocajiaqueate nocamantamajiaqueriquea quero nococa notsavetantimojiaquerigueti teeca irijorijoigueti notsavetacotaquerogueti Quenquetsatsarentsi Oganejencatatsica. Nocamantantajiacarica cameetsanijite iramenimentajiaquenijite iriatimpajia teequea ari nonquenquetsatashitempaji intati. ³Irraqueate Tito iriguentivetacaqueate guiriego cotanquitsi teequea quericaca cantatsine intotsaiquimashitacaantaquempa inquejetantanaquemparica joriojia. ⁴Oraqueate nocapiocajiaqueti ariquea iconoapojana irira tsarorentamampeajiatsica. Icantavetacaquea iquemisantajiaqueri Quirishito cotanquitsiquea manaqueate icoraquetashijiaquequea intati iramenajiaquena querocaca nocojiacani notsarventama-

jajiacarigueti Quirishito Jesoshi. Teequea incantajiaji Quirishito anetsanajiajero itioncanaquea Moishishini cameetsaniji irimeshiantajajica, cotanquitsiquea inintajiavetacaquea iriatimpajia acancani anetsanajiaquerome quejetaca omperaperaatajaji. ⁵Cotanquitsi naatimpajiaquea teequeate nonquemisantimajigueriji aatonijite icantashitatiimajitarotsi Quenquetsatsarentsimajaca itigarancaquea Aapani Irioshi, noninquetari pintsamajiaque-roqueate Quenquetsatsarentsi Oganejencatatsica.

⁶Choocejiavetaca jivatatsica, teequea intsatacaguenaji otsipa, manaquea icantajiaque: "Cameetsavaeque pitsave-tanqueca." Iriovecaquea jivatatsica cotanquitsiquea teequeate irooquea nameneji, manaquea yamenajiacaji Aapani Irioshi maasano ari aquejetava-caajia. ⁷Teequeate intsatacajaiavaquena, yamenajiaquetarite iriguenti tigarancaquena Aapani Irioshi notsave-tanquero Quenquetsatsarentsi Oganejencatatsica, notsatacajaiakeri teeca irijorijoigueti. Aritarite iquejetacaacari Peerero itigarancaquerigueti Aapani Irioshi intsavetantimojiaqueriniji joriojia. ⁸Irra Aapani Irioshi tigarancaquerica Peerero intsatacajaiakeri joriojia, iriotarite tigarancaquena naatimpa aisa nontsatacajaiakeri teeca irijorijoigueti. ⁹Oraqueate nocapiocajia-cagueti ariquea ichoocajiaque Santiago, Sepashi,^b jeri Joanca. Iriatimpajia iriguentijia quempoguijajiguirica quemisantajatsica. Ariquea yamenajiaquenagueti iriguenti cavintsajaquena Aapani Irioshi, iriguenti tigarancaquena nontsavetante, yaajiaquenaquea yaavacojiaquena naatimpa aisa Verenave, icantajiaquenaqueate:

b 2.9 Sepashi. Irootaque otsipa ivajiro Shimo Peerero. Pamenero Jn. 1.42.

“Aviatimpajia cameetsavaetaque pisavicaventajiaqueriqueate teeca irijorijoigueji pintsavetantimojiaqueri. Naatimpaquea nocancaniquea nosavica-ventajiaqueriqueate agonoro jorio nontsavetantimojiaqueri. ¹⁰Cotanquitsi aparo nonintajiaque pincavintsajajia-queriqueate irira apitsarorentarijiate teeca onchoocatimoteriji, aato pipeacogigari.” Tampatica yoaquero, irootaque-quea nonintamajataquea naatimpa, irootari nameta.

Paavoro icantomajaqueriqueate Peerero Antioquiaqui

¹¹Ariquea icoraquequegueti Peerero Antioquiaqui nocantomajaqueriquea namenaqueritarite mana yantaque-queate teeca oncameetsateji. ¹²Oraqueate tequeratagueti incoraqueje-igueji itigarancajiaqueca Santiago^c iriraquea Peerero manaquea iconoava-jari ishecatapinicagueti apitsarorentari-jiate teeca irijorijoigueji, cotanquitsi-quea coajica yamenajivaquerigueti-quea icoraquejiaque ariqueate icantapa-najanta itsinampirejajianaqueriquea, itsaroacaajiacaritarite incatsimatimenta-jiapojaqueri iramenajiaopojaquerigueti inconoajiaquempari teeca irijorijoigueji irishecaciaquempaguetei. ¹³Ariquea yamenajiaqueriguetei itsipapae jorio, ariqueate iquejetanacari itsinampirejaji-anaqueriquea apitsarorentarijiate teeca irijorijoigueji, aisa Verenave iquejetsita-nacaquea iriatimpa aisa. Itsajiavetacar-oquea cameetsataque inconoajiaquem-pari irishecaciaquempaguetei, cotanqui-tsiquea manaquea itsaroajianaque intati iquejetantanacaroca imaica itsinampire-jantajianacarica. ¹⁴Cotanquitsiquea naatimpa namenajivaqueriguetei iquejejianacaguetei imaica notsaquequea

teequea irinetsanatajeroquea ocatica Quenquetsatsarentsimajaca. Nocantsita-riquea Peerero nocapioacajiacaguetei: “Joriovequempiquea aviatimpa, cotanquitsi tee poguijatacotajeroji yameguetaca jorio, mana piquempeta-cotacari teeca irijorijoigueji. ¿Quero-quea ocotacani imaica picantantacaca irirajia caquinte teeca irijorijoigueji iroguijatacoteroja yameguetaca jorio?”

¹⁵Naroguentijia jorioja, iriguentitari irijanintajiaquea. Teequea iriguenti irijanintajiguenane irirajia teeca irijorijoigueji, irirajia teeca intsateroji itioncanaqueca Moishishini. ¹⁶Cotanqui-tsiquea notsajiaquequea aatoquea iroguenti imeshiimentajiganatsi Aapani Irioshi iramenajiaquenaguetei nonintajia-vetaca nonetsanajiaquero maasano itioncanaqueca Moishishini, aatotarite nagavejajigui nonetsanajiguiro. Notsaji-aquequea iroguentiquea irimeshiimenta-jiacaji aventaquempariguetei Jesoquiri-shito anquemisantaqueriguetei, irooqueate iramenantajiacajica Aapani Irioshi quejetaca tee ancovaeguisheti-matempaji. Irootaquequea noquejetan-tajiacaca naatimpajia aisa, naventajia-nacariquea Jesoquirishito cameetsaniji irimeshiajiaquenani. Noncantsijijem-piqueate aisa aatoquea iroguenti imeshiimentajaji anintajiavequempa-guetei anetsanajiaquero itioncanaqueca Moishishini.

¹⁷Cotanquitsiqueate anintajiaqueguetei irimeshiajiacaji Aapani Irioshi aventajia-quempariguetei Jesoquirishito ariguetei incantajite: “Jeriqueetisa covaequishetan-quitsica teeca inquemisanteroji itioncana-queca Moishishini”, ¿iroompa oncanque icovaeguishetacajaiacaji Quirishito? ¡Teequeate! ¹⁸Oraqueate ariguetei nompia-shitanajeroguetei novashiantaguetanaqueca

c 2.12 Santiago. Yoguiptsocajitiroguetei ivajiro icantajitiri aisa Jacovo.

noquemisantavetacagueti iroaqueragueti, ariquea manaquea noncovaeguisheta-quempaqueate intati. ¹⁹Coramani nonintavetacaqueate nonetsanataquero maasano itioncanaquea Moishishini, cotanquitsiqueate teequea nagavejeji nonquejetacaamajaquemparoquea. Irootaque notsatantacaca naroguenti covaequishetatsica. Imaicaquea teequea iroguenti nonquenquejacotajeji itioncanaquea Moishishini nonetsanaquero iroonijite irimeshiimena Aapani Irioshi, manaquea namenaquero quejetaca teeca onchoocatajeji. Iriguentitarite noquemisantamajatanaque Aapani Irioshi nonetsanatanaqueate maasano icanquea iriatimpa. ²⁰Oquejetaquea yompajacojitaquerigueti Quirishito coroshiqui mana itsipatacaantajiquenari yompajacojitaquea naatimpa aatonijite noquenquejacotajiro maasano covaequishetacaquenaca. Oquejetanacaquea mana nometojapitsatanaquero intati. Choocavequenaquea cotanquitsiquea teequea ariquea nonchoocatashitajempaji intati, iriguentitarite choocatanaquea Quirishito. Imaica choocaturajanaqueti notsinoqui irioquea agavejacaquena Irijanite Aapani Irioshi noquemisantamajatanaqueerigueti. Iriatimpa caaviji ipintsamajataquea imetojaventantaquenaca. ²¹Irootaquequea naatimpa aatoquea nocantitsiquea mana imetojaque Quirishito intati. Oramequea iroomegueti irimeshiimentajiacajime Aapani Irioshi anetsanamajajiaquerogueti itioncanaquea Moishishini manamequea irimetojaqueme Quirishito intati.

**Ichocashirentajiguiriqueate Ishire
Aapani Irioshi maasano
quemisantajiguirica**

3 ¹Aviatimpajia, Garashiaquitica, ¿arimpate tee pintsatimateji? ¿Teequea pamenacojiaquempaji yamatavijitaquempigueti? Pitsajiavetacaquea noquenquetsatacaajiaquempi-

gueti coramani iriguenti notsavetanataque Jesoquirishito yompajacojitaquerigueti coroshiqui. Oconijatimomajajiaquempiqueate, notampaticamajataquerotari nocantajiaquempica. ²Imaica pincantajiguena, ¿taaqueate itigarancantacarica Aapani Irioshi Ishire ichocashirentajiaquempigueti? Teequea iro intigarancantaquemparica pinetsanamajajiaqueromegueti itioncanaquea Moishishini. Iroguentiquea itigarancantacarica manaquea yamenajiaquempi piquemacotavaquerigueti Quirishito Meshiantatsica ariquea piquemisantajianaqueri. ³¿Queroquea ocotanacani teequeate pintsajiajeji? Pipariajianacarogueti iroaqueragueti piquemisantajiaquerigueti Quirishito, iriotaque agavejacaajiaquempi Ishire. ¿Pijiqueji imaica pagavejaquero aviatimpa pitampishicaqui? ⁴Iroaqueraqueti piquemisantajiaquerigueti oshequiquea patsipeventajiacariquea Jesoquirishito. Imaicaquea aatogueti poguijatacotanajiri manaquea patsipetashitaquita intati. ⁵Aapani Irioshi itigarancajiaquempi Ishire yagavejacaajiaquempiquea ariquea pamenacaantajiaquero oacaantantatsica intati, cotanquitsiquea teequea irooquea intigarancantajiguempiri pinetsanamajiaqueromegueti itioncanaquea Moishishini. Iroguentitarite itigarancantajiaquempirica yamenajiaquempitari piquemacojiaquerigueti Quirishito Meshiantatsica piquemisantajianaqueriqueate.

⁶Ariquea iquejetaca Averaameni iquemisanqueriqueate Aapani Irioshi, irootaquequea yamenantacarica iriatimpa quejeveacaquea tee incovaeguishetimatempaji. ⁷Irootaquequea pintsatantajiaquempaca maasano quemisantamajajiaquerica quejejiacaquea iriguentica ichoviquini Averaameni, iquejejiacaritarite. ⁸Coramani

itsaquequea Aapani Irioshi incavintsajajia-queri caquinteguetatsica teeca irijorijoi-gueji, irimeshijiaqueriquea maasano aventajiaquemparineca iramenantajia-quemparica quejevaeca tee incovaeguishe-timatempaji. Ariquea icantacotsijiacari-quea icanquerigueti Averaameni, itsavetantaqueroquea oguishinejantatsica, ocanquetari itioncacaantaqueroqueti ocanti: “Aviguentiquea noncavintsajacota-tantajiaquemparica maasano caquinteguetatsica quepatsipaequitica.”⁹ Ariqueate iquejetacaajiacariqueate Aapani Irioshi maasano aventajiacarica icavintsajajiaque-riquea iquejetacaajiacari Averaameni yaventacarigueti.

¹⁰Maasanotari aventavetaroca yantaquea ipanquenavetacarogueti irimoncarataqueroome Cantacaantanentsi itioncanaqueca Moishishini, ariquea incatsimatimentajiaqueri Aapani Irioshi. Itioncacojiquerotarite ocanti: “Incatsimati-menqueriquea Aapani Irioshi maasano teeca irinetsanamajatanaqueroji maasano Cantacaantanentsi itioncanaqueca Moishishini.”¹¹ Itsamajajitaqueroquea teequea quericaca agavejatsine irinetsana-majataqueroquea maasano Cantacaanta-nentsi itioncanaqueca Moishishini iroonijite iramenanquemparime Aapani Irioshi quejecaqueate tee incovaeguisheti-matajempaji. Choocatarite otsipa itioncaji-taqueca ocantiquea: “Irraquea comajashi-rentanquitsica incoquempani inchoocagui-teni irooriji yaventaguitarini Aapani Irioshi.”¹² Oraqueate Cantacaantanentsi teequea oncanteji mana aventajiguempari Aapani Irioshi anquemisantajigueri cameetsanjite acancani anchoocaguiteni, manatarite ocantavecaquea: “Quericaca-quea netsanamajataquerone ocaticapae incoguitempaniquea inchoocaguiteni.”

¹³Cotanquitsiquea ivegaraventacajiro Quirishito aatoniji icatsimatimentajita-cajiro tioncanquitsica teeca anetsanaji-

gueji, iriguentitari piyajaji yatsipetacaan-tajitacarica iriatimpa. Choocatarite tioncanquitsica ocanti: “Yompajacojitiri-gueti caquinte inchoopaqui yonigaanta-jiqueriquea mana icatsimatimenqueri Aapani Irioshi igovaeguishe.”

¹⁴Irraquea Quirishito Jesoshi teequea apaniroquea irimetojaventajiguenaji naatimpajia jorioja, imetojaventajia-queriqueate aisa teeca irijorijoi-gueji cameetsanjite irimeshijiaquerinijite maasano aventajiaquemparineca quemisantajiaquerineca, aritarite icanquerini Averaameni coramani. Imeshijiacajiquea cameetsanjite intigarancaquerinijite Ishire inchooca-shirentajiacaji aatimpajia aventajia-quemparineca, icanquetari coramani intigarancaajiri.

Icanquerica Aapani Irioshi Averaame

¹⁵Imaica, napitsaroverantarijiate, nonintaquequea pinquenquejajiguero ocatata amejigaca. Taaca opajitapae anintacaanaquerica ojocanajenerica itsipa, manaquea antioncacotsitemparo-quea paperiqui, ariqueate aisa antionca-quero avajiro aatoniji yogaashijitajaro acantajiaqueca. ¹⁶Coramani icamanta-querigueti Aapani Irioshi incavintsaja-queri Averaameni icantiriquea inqueje-tacaquempariquea aisa inchoviquitana-queca. Teequea incanteriji: “pinchovi-quijianaqueca”, manaquea icantiri: “pinchoviquitanaqueca”, iriguentitarite icantacoque Quirishito. ¹⁷Ariquea ocoramanitapojaquegueti aapojacagueti 430 ajagantsini iquenquetsajencataca-queriquea Moishishini icamanqueriquea quero incojiaquempa ishiraerijia intsaromentajiaquemparigueti. Ariquea itioncavaqueroquea Moishishini, cotanquitsiquea Aapani Irioshi teequea incantashitatiguemparoji icanquerica Averaameni coramani, iroorijite

icanqueri irinetsanataqueroquea icanquerica. ¹⁸Iroomequea incavintsajimentajiacajime anetsanajiaqueroqueti itioncanaqueca Moishishini arimequea aatomequea icantrime Averaameni mana incavintsajaqueri intati yamenaquerigueti iquemisantaqueri. Cotanquitsiquea inchiquiojitsita inintanaque Aapani Irioshi incavintsajaqueri, ariquea irooquea icantaquerica.

¹⁹Iroosacanicate źtaaqueate itioncaantacaricaquea Aapani Irioshi Moishishini? Manatarite itioncacaantacarica intsamajamentajiqueronijite mana yantaguishejiguiro covaeguisherentsi maasano caquinte. Manatarite inintaque Aapani Irioshi irinetsanajitaquero itioncacotanaqueca Moishishini arejevaetapojemparoquea irinetsanataquero icanquerica Averaameni coramani incoraquepojaquegueti inchoviquitanaqueca. Itigarancaqueritarite Aapani Irioshi irashivantijitete incamantajiguero Moishishi maasano icantajiaquerica, irioquea tsatacaajiaquerine igonorojia. Ariquea yogaajiavaqueneri. ²⁰Cotanquitsiquea icamanquerigueti Averaameni, inchiquiojitsitaquea icamanqueri iriatimpa, teequeate iriguenti incajemeji itsipa aanaquenerineca. ²¹¿Arimpate oratica itioncanaqueca Moishishini mana ocantashitatiacaró icanquerica Aapani Irioshi Averaameni? ¡Teequeate! Oraquea anijacaantemegueti itioncanaqueca Moishishini acancaninjite anchoocajiaque, iroomequea anetsanashirentantajiaquempeamequea. ²²Cotanquitsiquea oraquea Tioncarentsimajaca ocanti agavejajiaqueri covaeguisherentsi maasano caquinteja, oquejevetaca osantanatacotaqueri, teequeate iragavejajigueji irovashiantajigueroji. Oquejetantacaca imaica cameetsanjite onetsanatimentaquempanijite icanqueca Aapani Irioshi coramani, irinetsanata-

queneriquea maasano aventajiaquemparineca Jesoquirishito.

²³Coramani tequeratagueti aguempajioatica aventashirentagantsi, oquejevetaca oquempoguijajiacaji itioncanaqueca Moishishini, oquejevetaca ashitacojiacaji arejevaetantacaró yonigaantantajitacaroca aventashirentagantsi. ²⁴Oraquea itioncanaqueca Moishishini oquejetacari quempoguijantatsica aajianacajineca Quirishitoqui irinetsanashirentajiacajiniji aventajiaquemparigueti. ²⁵Cotanquitsiquea imaica aventashirentaquemparigueti, teequea irio camantajajine quempoguijantatsica.

**Maasano quemisantamajajatsica
quejejiacaquea iriguentica
ichoviquitanaqueca Averaameni**

²⁶Maasano aviatimpajia aviguentijia irijanijiate Aapani Irioshi, piquemisantajiaqueritarite Quirishito Jesoshi, paventajiacari. ²⁷Maasanotarite aviatimpajia viñacajianquitsica quemisantajiaquerica Quirishito manaquea piquejejiacari iriatimpa, oquejetaca piquitsaajajari. ²⁸Imaica acarajiavetacaquea jorio jeri teeca irijoriotěji, yaajanijitacaca jeri teeca irajaanijitempariji, shirampari jero aisa manquigarentsi, cotanquitsiquea aquejetavacaajiaqueca maasanotarite atspajiacariquea Quirishito Jesoshi ariquea aquejejiacari. ²⁹Quejejiacajiquea apatiroti acanca. Imaica aviatimpajia quemisantajiguirica Quirishito quejejiacquempiqueate aviguentijia ichoviquitanaqueca Averaameni, icavintsajantajiaquempanijite Aapani Irioshi inetsanaqueroquea icanquerica Averaameni.

**Quero icojiavetani tequeratagueti
incoraqueteji Quirishito**

4 ¹⁻²Jero imaica nonquejetacaajiaquempiroquea aisa. Querica irijanintanquitsica icanquequea: "Oraquea nometojanajegueti irioqueate

ashintajemparone irijani maasano nashintaguetacaca, cotanquitsiquea aatotaquea yojoquitajitanari. Oraqueate inquenquevaritanajegueti ari irojocajitajeneri irashintamajatajemparoqueate.” Pamenerija, irira irijanite yashintaguetacaroqueate maasano, cotanquitsiquea tequeratanicate inquenquevariteji manaquea iquejemajatajariqueate aajanirentsi, choocarite aajanitajarica oguimoncajirica. Iriatimpaqueate yoguijaqueriquea inquenquevaritanaqueata, ariquea irojocajitajeneri irashintamajatajemparoqueate. ³Ariqueate aquejejiacaquea aatimpajia iroaqueraqueti tequerataguete anquenquevarishirenteji, apampiatacojiavetacaroquea yamejigaca caquinte, itsatacaantica quepatsiquitica. Quejevetacaquea aajanijiacaji. ⁴Cotanquitsiquea aapojacaguete savincaguiteri inintacaqueca Aapani Irioshi coramani, ariquea itigarancaqueri Irijanite, ovoaqueriquea manquigarentsi, inetsanatantacaroca iriatimpa itioncanaquea Moishishini. ⁵Oquejetantacaquea imaica cameetsanijite irovegaraajataji aatimpajia maasano irooriji omperatacaji itioncanaqueca Moishishini aguijatacojiagueroqueti. Yovegaraajatajiqueate cameetsaniji impeantajiajajica Aapani Irioshi irijanijiate. ⁶Aroquentijia irijanijiate imaica, irootaquequea itigarancantacarina Ishire Irijanite inchoocashirentajiacaji, icajemaquequea: “iAapani! iAapani!” ⁷Teequea omperatajempio mperavetaquemica, imaicaquea avirotaquequea irijanite Aapani Irioshi. Irijanintamajaquempiquea Aapani Irioshi, icavintsajaquempitarite yojocantaquempiroca maasano irojocajiaquenerica irijanintajiacaca.

⁸Coramani tequerataguete pintsajiave-tempariji Aapani Irioshi, iriguentiquea pirioshimajajavetaca caarica irioshima-

atatsi, ariquea yomperajiavequempi. ⁹Cotanquitsiquea imaica pitsajiaqueriquea Aapani Irioshi, arimequea noncandeme iriatimpa itsajiaquempiquea icavintsajiaquempiquea. Imaicaquea ¿quero oocani pinintantajiacaca pinquejetanajempa coramani poguijatacojiavetacarogueti yamejigaca caquinte teeca agavejeji omeshiante? ¿Arimpa pininque omperajiajempio? ¹⁰Aviatimpajia pishineventajianajaroquea savincaguiteripae aapojacaguete pishine-tantacaca, aisa iroaqueraqueti isotoaji taai, jero aisa ishinetantajitaca yogavisajaiguete arejetajaguete ajagantsipojajiguete, maasanoqueate pishineventajianajaro pijijiaqueji ariji poguishinejantajiaquemparica Aapani Irioshi. ¹¹Notsarocojianaquempiquea aricaja natsipeventashijiaquempi intati notsatacajaiaquempiguete piquejetanajampaquea coramani poguijatacotantajarica itsatacaantajiguica caquinte.

Paavoro iquenquejajiaqueriqueate quemisantajiajsica

¹²Napitsaroveritarijiate, coramani teequeate poguijatacojiavetemparoji itioncanaqueca Moishishini. Ariqueate noquejejiaguempi naatimpa iroaqueraqueti noquemisantaque novashiantanaquero teequeate nonetsanatajeroji. Imaicaquea aviroquea poguijatacojiavetanaajaro, cotanquitsiquea nonintaquequea pinquejejianaquea naatimpa povashiantajianajoroqueate, aatoqueate poguijatacojiajirotsi. Coramani noimojiaatimpiguete cameetsa paajiaaquena intati teequea pimanintenaji. ¹³Pitsajiaquetari nashinoncajacaguete teequea nagavejajempaji noaguetajeji osamani, manaquea aviguentiquea nochoocatomoguitimpini nopariantanacaroca notsatacaajiaquempi notsavetantaquero Quenquetsatsarentsi Oganejencatatsica.

¹⁴Nashinoncajamavetacaquea cotanquitsiquea teequea pimanintajiguenaji, manaquea patsiperejacocarointati. Piquemisantajiaquaenaquea manaquea piquejetacaajiaquaenaquea irioaquea coraquetanquitsi irashivantite Aapani Irioshi, aisa quejetaca irioaca coraquetanquitsi Quirishito Jesoshi. ¹⁵Coramani pishinevaejianacaquea noconoajiaquempiqueti. Noncantajiaquemimeguetiquea “Pojoquenaroshitsi poquija”, pinquitsorejaquenaromepojocajiaquenaromequea. ¿Quero ocotacani imaica teequea pishineventajiajenaji? ¹⁶Notsatacaamajiaquempi-tari iroomajatatsica. Imaica ¿iroocampa picatsimatimentajiaquena?

¹⁷Irraqueate itsipa caquinteja manatarite inintajiaquequea povashiantajanajanaquea aatoquea piquemisantajanajana, irootaquequea inintantajiacaca intsatacajiaquempiquea itsatacaantajiguica iriatimpajia cameetsaniji pishineventajiaquempariniji pinquejejianaquempariquea. Irootaquequea yoguishinejantamampeajiaquempara. ¹⁸Cameetsavecaqueate irinintajiaquegueti itsipa pishineventajiaquempara, cotanquitsiquea cameetsaquea irinintajiaquegueti, aatoquea yamatavijajiguimpi. Arimpa naatimpa teequea namatavijajiguempiji tampaticaquea noaquero notsatacajiaquempi-gueti, cotanquitsiquea imaica nochoocaquegueti osamani jac pimaisantajanajanaquea. Aatomesano piquejejiga imaica, nonintavecatarite picancaniquea pishineventajiaquaenaquea. ¹⁹Nirijani-jiate, naatimpaquea natsipeventajiaquempiquea aisa, nonintamajataquetarite namenajiaquempi pinquejemajajiaquempariquea Quirishito, caavijiqueate natsipeventajiaquempi quejecaquea atsipetagueti manquigarentsi ovoacotigueti. ²⁰Nonintavecaquea imaica

nonchoocaqueme aviatimpajiaqui anquenquetsatavacaquempa, nontsaqueroniji queroca oocani piquejetantanajaca.

Iquejetacaacanari Agare aisa Sara

²¹Pincantajiguenajate aviatimpajia nintajiaatsica pinetsanajiaqueroqueate itioncanaquea Moishishini: ¿arimpate tee pintsamajajigueroji maasano ocanquea? ²²Itioncacojiquerotarite ocanti choocaquea mavite irijanite Averaame, aparoquea ashi iroatimpa ashincaca imanquigaremajaca, choocaquea itsipa ashi iroatimpa imanquigaremajaca teeca irashintajitemparoji. ²³Irraquea irijanite ovoaquea yashintajitaca manaquea ivoaque iroorijite inintashitacari caquinte, cotanquitsiquea irira irijanite ovoaquea teeca irashintajitemparoji ivoaque irooriji irirotaque icantacotsitacaca Aapani Irioshi irojocaqueneri Averaameni.

²⁴Choocaquea oshiacaantacaca ocatica, oraquea manquigarentsijia oshiacaantacarotari mavite paaquito. Aparo paaquito oponeaca otsempiqui icantajitica Shinai, iroguenti quejetacaro Agare voaquerica chaajaniquirijia peajianquitsineca yashintajitaca. ²⁵Oraquea Agare ocantacotaquero otsempi Shinai choocatanquitsica Araviaqui, aisa ocantacotaquero Jerosare choocatanquitsica imaica, maasanotari jorijia ipomerenstiventajiavetacaro itioncacotanaquea Moishishini irinetsanajiaquero, quejetaca omperaperaajiacari. ²⁶Cotanquitsi aatimpajia aroguenti aquejejiacari ochoviquijianaquea imanquigaremajaca Averaame teeca iromperaperaajitemparji. Iroatimpa iroguenti ocantacotaque otsipa Jerosare inquitequitica. ²⁷Choocatarite itioncanaquea Isaiashini ocanti:

Pishinetempaja shiravaro, aviatimpa teeca pogueji.

Tequerataquea pantsipetimatempariri pirijanite, imaicaquea pishinevaetempaja.

Iroshequiamajatanaquetari pincho-
viquijianaqueca,
iranaamajajianaqueriqueate oncho-
viquijianaqueca pomperare
irijanintacaacaca manquigatim-
pica.

²⁸Napitsaroverentarijiate, aatimpajia
quejejiacajiqueate Ishaaco, irijanintajia-
cajitarite Aapani Irioshi quejetaca
icanquerica Averaame. ²⁹Coramani
iriraquea irijanite voanquitsica irooriji
inintashicari iriatimpa, icatsimapiniqu-
riqueate Ishaaco ovoaqueca Sara
yagavejacaquerogueti Ishire Aapani
Irioshi. Ariqueate iquejejiacariqueate
imaica netsanajiaqueroca itioncana-
queca Moishishini icatsimapinijiacaj-
iqueate aatimpajia irijanintajiacaca
Ishire Aapani Irioshi. ³⁰Cotanquitsi-
queate ¿quero ocanque Tioncarentsi?
Ocantieca: “Manaquea pintigaranque-
rotsija osamani oratica omperarentsi
ontsipatanaquempariqueate irijanite.
Irijanite omperarentsi aatotarite
itsipatashitimaritsi irijanite manquiga-
rentsi teeca iromperaperaajitemparoji
irashintaquemparogueti yashintagueve-
tacaca iriri.”

³¹Imaicaqueate, napitsaroverentarijiate,
teequea iro choviquitajine omperarentsi,
oquejevecaquea irooquea choviquijia-
caji teeca iromperaperaajitemparoji.

**Aatoqueate piquemisantajiguiritsi
cantajiatistica: “Pinetsanajiaquero
itioncanaqueca Moishishini”**

5 ¹Yoguipaquijacaantajiacajiqueate
Quirishito aatoniji atsipeventaja-
rotsi aquemisantajiajirotsi omperaperaa-
jivetaacajica, mananijite anchocatashi-
jjajempa intati. Imaicaquea pintima-
naque, aato piquemisantajirotsi ompera-
jivetaquempica. ²Naroguentiquea
Paavoro tioncaquempiroca. Pinquemi-
santamajajiaqueroja noncamantajia-

quempica imaica: pintotsaiquimashita-
caantavequempagueti pijiquegueti
irooquea irishetantajempiroca Aapani
Irioshi pigovaeguishere—pinquejeji-
quempagueti imaica aato yagaveji
Quirishito irimeshiguempi. ³Noncantsiji-
ajempiquea quericaca nintanquitsineca
intotsaiquimashijiqueri, manaquea
irinetsanamajateroja maasano itioncana-
queca Moishishini, teequea apaniro
oncanteji intotsaiquimashijiqueriquea.

⁴Aviatimpajia nintajianquitsica pinetsa-
najaquero itioncanaqueca Moishishini
iroonijite irimeshiantajiaquempicaquea
Aapani Irioshi, manaquea piquenashijia-
naca intati teequeate pintsipajiajempa-
riji Quirishito, aisa teequeate pinintaji-
gueji incavintsajajiguempiji Aapani
Irioshi. ⁵Cotanquitsiquea naatimpajia
noguijajiaquequea incavintsajajiaquena-
quea oncoramanitapojajeguete, incamee-
tsamajajajena iramenajiaquenaquea
quejetaca tee noncovaeguishetimaji-
guempaji. Irioquea agavejacaguenane
Ishire noguijatanquemparica, naventa-
caritarite. ⁶Arimajaguete aquemisanta-
majajiaqueri Quirishito Jesoshi
iriraqueate Aapani Irioshi aatoquea
iquenquejacotiro aricaca atotsaiquima-
shijiaa aricaquea tee, iroguentitarite
inintamajati iriatimpa anquemisantama-
jajiaqueri. Anquemisantamajajiaqueri-
guete ariquea ampintsajianaquempari
maasano caquintepae.

⁷Oraqueate iroaqueraguete piquemi-
santamajajiavecaroquea iroomajataistica.
Ariquea iticaajitavaquempi irootaque-
quea povashiantantajanacaroca.

⁸Teequeate irioquea quejetacajaguem-
pine Aapani Irioshi, iriguentitarite
cajemajiaquempiquea iroaqueraguete.

⁹Icantajitiquea: “Onconoaquempara-
guete capichajaniqui anempoacaquero-
neca pan, ariquea oncotanaquempa
anempoanaquequea maasano ose.”

Ariqueate iquejejiaca caquinte inchoo-
caqueguetiquea apaniro amataatsica
impajencajiaqueriqueate igonoro.

¹⁰Naatimpaquea notsaqueriquea
Amajirote, irioquea amitacojiaquempine
aatoniji piquenashitanaca pipampiataco-
tirotsi teeca iroomajaca. Cotanquitsi-
quea quericaca asereaquempica
incatsimaqueriquea Aapani Irioshi.

¹¹Napitsariventarijiate, naatimpaquea
arimegueti nocancanimegueti noncan-
queme intotsaiquimashitacaantajia-
quempaquea maasano inquejetantajia-
naquemparica joriojia, aatomequea
icatsimajiganame nogonorojia joriojia,
aisa aatomequea icatsimatimentajigana-
rome notsavetanquerigueti Quirishito
imetojaventacajigueti coroshiqui.

¹²Iroosacanicate iquejevintsajiaquero-
guetiqueate imaica, iarimesano
incanquempame tsein tsatic iriatimpa
maasano asereajiaquempica cantajia-
tsica pintotsaiquimashijiaquempa!

**Arigueti pimpintsatavacaajiaquempa, ari
ovegarapoja**

¹³Aviatimpajia, napitsariventarijiate,
icajemajiaquempiqueate Aapani Irioshi
irimeshijiaquempiniji, aatoniji patsipe-
ventajijaaro pinetsanajiajero itioncana-
queca Moishishini, cotanquitsiquea
teequea irininteji ancovaeguishejia-
quempa, aatoquea picantajiguitsi:
“Imaicaquea cameetsavaeque nantaque-
queate taaca opajitapae noninquca
naatimpa.” Manaqueate pimpintsatava-
caajiaquempa pamtavacaajiaquempa
intati. ¹⁴Icanquetarite Aapani Irioshi
itioncacaquerigueti Moishishini:
“Pimpintsataquemparija pigonoro
pinquejetacaajempa pipintsatagueti
aviatimpa.” Pinquejetacaajiaquemparo-
gueti imaica piteroncaqueroquea
pinetsanaqueroquea maasano itionca-
caquerica. ¹⁵Cotanquitsiquea namena-

jiaquempi manaqueate picatsimatava-
caajianaca intati, piquejejianacari
chaonarijite yatsicavacaacagueti.
Inchiquiojisanoja pitsinampirejavacajai-
anacatsijate aatoquea pitsipatavacaaja.

**Pinquemisantamajiaqueri Ishire Aapani
Irioshi**

¹⁶Imaica noncamantajiaquempiqueate
pincoguitempanija pinquemisantamaja-
jiaquerijate Ishire Aapani Irioshi
tsatacaashirentajiaquempica. Pinquejeji-
aquempagueti imaica aatoquea pipeaca-
jaijaa pinintaguishejiguica aviatimpajia.

¹⁷Choocatarite covaequishetacaacajica
anintajiguica ampeacaaguishejiguempa,
cotanquitsiquea irira Ishire Aapani
Irioshi iroguentiquea inintaque ancoma-
jamajiaquempa, irootaquequea
ampeacaajiaquempagueti anintaguishe-
jiaqueca aatimpajia aatoquea aquemi-
santajiguiritsi iriatimpa. Oraquea
anquemisantajiaquerigueti, aatoquea
apeacajiaaatsi anintaguishejiaqueca
aatimpajia. ¹⁸Iriogueti choocashirentajia-
aquempine Ishire Aapani Irioshi,
aatoquea irooquea patsipeventajijaatsi
pinetsanajiajero itioncanaqueca
Moishishini aatoniji icatsimajiguimpi
Aapani Irioshi.

¹⁹Atsajiguirotarite yantaguishejiguica
irirajia quemisantaquero ca inintashigue-
vetacaca: yoashijiguiro teeca iro
imanquigare, manaquea icovaeguishe-
jiaca intati, yantaguishejiaquero gueti
teequeate impashiventacaguemparo.

²⁰Itsariventajiacari irioshivijitashita-
caca, imatsitantajigui, icatsimatanta-
jigui, yantashitantajiga, icatsimatacotsi-
tantaguetiro taaca opajitapae, icatsima-
jiaquequea, iriguenti quenquejacota-
jatsi, aisa teequea intsipatavacaajiguem-
paji manaquea itsinampirejavacaajia
intati. ²¹Inintsijiguiriqueate yashinta-
guetaca itsipa, imetojantajigui, ishinqui-

jiga, aisa iconoajiavaqueroquea yantaguishejiaquequea taaca opajitapae. Noncantsijiajempiqueate iriraquea quejejiaqueroquea imaica aato yoajigui ichoocatigueti Aapani Irioshi.

²²Cotanquitsiquea ichoocashirentajiacajigueti Ishire Aapani Irioshi apintsatavacaajiaquea, ashinevaejiaquea, teequea ashoshoguitejajempa, manaquea atsiperejacojiaca intati, apintsatantajanacaquea, acavintsajantajianaquequea, netsanaquea oaquero acanqueca. ²³Aisa aquemisantacojiacaquea intati teequea ampigatantajiguempaji, aisa atampishitashiguetaqueroquea taacagueti opajitapae. Teequea incantimentajitajiroji anquejejiaquempaqueate imaica. ²⁴Irraqueate tsaromentamajajigarica Quirishito Jesoshi quejetanacaquea itsipajiacari yompajacojitaquerigueti coroshiqui, manatarite imetojapitsajianaquero inintajiavecaca, irootaquetari teeca irantantajajemparoji. ²⁵Ichocashirentajiacajigueti Ishire Aapani Irioshi itsatacaajitacajiqueate, iroosacanicate imaica jamequetirote anquemisantamajajianaqueriquea anetsanajiaqueroqueate maasano inintaguequeca. ²⁶Aatoquea aventacojiga, aatoquea acatsimatacaguiri itsipa, aisa aatoquea anintajigui anaimanatan-tajiaquequeate.

Pamitacotavacaajiaquempa

6 ¹Napitsarorentarijiate, aviatimpajia ichoocashirentamajajiaquea Ishire Aapani Irioshi pamenajiaquerigueti pigonoro ipeacaaca covaequisherentsi cameetsaquea poaqueri pincantomajajiaqueriquea cameetsanijite impishonquimentanajeronijite, cotanquitsiquea inchiquiojia picatsimajiguiritsi, manaquea pincavintsajeriquea. Ariquea pamenamajajiaquempa quea aatonijite piquejejianaca aviatimpajia aisa

pincovaeguishejianaquempa. ²Pamitacotavacaajiaquempa quea pintampishitashitimentajiaqueronijite covaequishetacaantatsica. Pinquejejiaquempagueti imaica jac pinetsanajiaqueroquea itsatacajaiacajica Quirishito. ³Choocagueti teeca iranaantimateji cotanquitsiquea iramenuempagueti ijiqueji caaviji yanaantaque, irisatiqua amatavijaatsi. ⁴Pamenajiguempajia maasano aviatimpajia, pamenajiaquem-pagueti quea picomajamajajiaa aviguentiquea shineventajatsine. Aatoqueate iro pishineventajiga pijiquegueti panaaqueri itsipa. ⁵Maasanojiatari inchiquiojitsitarite iquejetaca iriatimpa yantajigui gueti irooca cameetsatsica irooca covaequishetatsica, tee irio itsipa quejetacaguemparine.

⁶Imaica nonintaque noncamantajiaquempiquea ancavintsajajiaqueriquea tsatacaajiacajica Iguenquetsatsare Aapani Irioshi, ojocajiaqueneriquea taaca opajitapae cameetsaguetsatsica.

⁷Inchiquiojijata pamatavijatsi aviatimpa: iriraqueate Aapani Irioshi incatsimajiaqueri maasano cantimanajiguirica. Taaca opajita itsaqui caquinte, irootaque iravaje. ⁸Irra antaguishejiguiroca inintashiguetica, quejetaca iro itsaquica, coajica ontsoroanaque, ari quea iraviguitaje covaequisherentsi; cotanquitsiquea iriraquea savicaventiroca inintaguetica Ishire Aapani Irioshi, quejetaca iro itsaquica, ari quea iravaje anijagantsi poneanquitsica Ishirequi Aapani Irioshi, incoguitempani iranijaguiteni. ⁹Imaica jamejate antampishitashijiaquero antajiaquequea cameetsaguetsatsica, aatoquea aperataro. Aatoguetei aperajiga anquejetaquempariquea aavajiroca oitsoqui, incavintsajacajitari Aapani Irioshi oncoramanitapojajeguetei. ¹⁰Irootaquequea nocantantajiaquempica jaameja ancavintsajajiaqueri-

quea maasano, ariquea agaanaquempa ancavintsajamajatanakeri apitsaroven-tarijiate tsaromentajiacarica Quirishito.

Iteroncajianajinirigueti icantajiaquerica

¹¹Imaica narotaque Paavoro tioncava-quempiroca ocativa. Irootaque pintsatantava-quemparoca: inirojegui nocanquero notioncaqueroqueti nacoqui.

¹²Iiraqueate cantajiatsica pintotsaiquima-shitacaantajiaquempa manatarite inintajiaque irishinimentajiaquempari igonorojia joriojia. Yamenajiaquetari incantajiaquequempagueti: "Iriguentiquea anquemisantajiaque Quirishito metojaventa-jiacajica coroshiqui", manaquea irantsipeta-cajiaiaquempariquea incatsimajiaqueri.

Irootaquequea icantantajiaquempica pintotsaiquimashitacaantajiaquempa.

¹³Jeriquea totsaiquimashitacaantajiatsica teequea arimaja irinetsanamajajigueroji itioncanaqueca Moishishini, cotanquitsiquea manaquea inintajiaque pintotsaiquimashita-caanquempa irooquea iraventantajiana-quempaca iramenajiaquequeti yagavejajia-quempi itotsaiquimashitacaajiaquempiquea pinquejetantajianaquemparica iriatimpajia

pitsinoqui. ¹⁴Cotanquitsiquea naatimpa teequea noninteji naventacotempaji, irooquea noshineventamajataca imetojaven-tacajigueti Amajirote Jesoquirishito coroshiqui, teequea noshineventajemparoquea maasano ishineventaguishetacaca quepatsipaequitica, quejetacaquea mana ometojapitsatanaquena intati, aisa oquejetaca nometojapitsatanaquero, teequea nonintimatajeriji nonquenquejaguetajero.

¹⁵Aritarite aventajiaquempariqueti Quirishito Jesoshi, teequea iro incoacotempaji antotsai-quimashitaquempa irooca aato, iroguenti-quea icoacotaca iroaquerashirentajianajaji.

¹⁶Maasano quemisantajiaqueroneca ocativa, noninque Aapani Irioshi inchoocatacaajia-queri cameetsa, incavintsajajiaqueri, iriojiaquea yashintamajiacaca quejetaca yashintajiacari ishiraerijiani coramani.

¹⁷Imaicaquea ariotapojaque yasereaji-taquena ipigapigajiquena, choocatarite notsinoqui piropiroini ipiropiroitimenta-jiquenari Amajirote Jesoshi.

¹⁸Imaica, napitsarovenarijiate, noninquequea incavintsajajiaquempi Amajirote Jesoquirishito pishirequi. Ari oncoquempa.